

SOL DI PUEBLO

BRIYANDO FUERTE • TRECIENDO CLARIDAD

MINISTER GEOFFRY A ANUNCIA:

GASOLIN TA SUBI!




Fuel Type	Price per Liter
GASOLIN	2.65
DIESEL	2.57

AUMENTO DI 17 CENTS!



**UN
MINISTER
CU 5
CARTERA,
PERO NI
UN SOLO
RECIBO**

EVELYN NA GERLIEN:




'E VIAHE NO TA PRIVÁ!

SI BO A PAGA, MUSTRA KI DIA, CUANTO Y NA KEN!



DVG ta informa

HANTAVIRUS Y E MENASA CU E TA REPRESENTA NA E MOMENTO AKI PA ARUBA

ORANJESTAD, Aruba – 12 mei 2026: Directie Volksgezondheid (DVG) kier informa comunidad tocante Hantavirus y e riesgo limita cu e malesa aki ta representa te na e momento aki pa Aruba.

Hantavirus ta un malesa zoonotico cu por wordo transmiti door di raton of djaca infecta pa hende. Segun expertonan y investigacion científico, den cierto variante specifico manera Andes virus, transmision di hende pa hende tambe por sosode, pero generalmente solamente den contacto hopi cerca y prolonga cu un persona infecta manera cerca pareha y dunadornan di cuido of familiar (mantelzorg).

Na Aruba, no tin indicacion cu nos poblacion local di raton of djaca ta infecta cu Hantavirus. Pa cual motibo, e posibilidad di transmision di animal pa hende na Aruba ta considera hopi limita.

Actualmente Aruba no tin caso confirma di Hantavirus. Unico posibilidad pa introduccion di e virus na Aruba, ta si un bishitante of residente regresa Aruba despues di un biahe pa un area unda Hantavirus ta presente manera:

- Argentina
- Chile
- Bolivia
- Paraguay
- Uruguay
- Brazil

Segun literatura, e

periodo di incubacion di Hantavirus por varia entre 1 te 6 siman prome cu sintomanan cuminsa aparece. E sintomanan inicial por inclui:

- Keintura
- Dolor muscular
- Cansancio extremo
- Dolor di cabes
- Nausea of sacamento
- Tos seco

• Problemanan respiratorio
Den caso serio, Hantavirus por afecta pulmonnan y crea complicacionnan respiratorio severo.

DVG ta recomenda personanan cu a biaha of ta planea pa biaha pa paisnan of areanan di naturalesa den paisnan unda Hantavirus ta presente, pa evita mishi cu animalnan salvahe bibo of morto. Ta importante pa keda alerta y conciente di nan salud durante y despues di nan biahe y si desaroya sintomanan ta importante busca atencion medico y informa doctor tocante nan historia di biahe.

Ademas, DVG ta conseha comunidad pa sigui solamente canalnan oficial y informacion confirma di autoridadnan competente pa evita confusion, speculacion of wordo mal informa door di informacion incorrecto cu ta circula riba red social y otro plataforma digital.

Directie Volksgezondheid ta sigui monitor constantemente tur desaroyo internacional y regional pa evalua riesgo y



impacto cu Hantavirus of otro malesa por representa pa salud publico di Aruba y lo continua informa comunidad debidamente. Bo Salud, Nos Prioridad

Pa mas informacion, like nos Facebook page Directie Volksgezondheid DVG Aruba, follow nos riba Instagram directie_volksgezondheid_aruba, sigui nos den WhatsApp Channel, ricibi tur informacion den Aruba Health App, bishita www.dvg.aw, yama 5224200 of manda email na servicio@dvg.aw

Clasificados

SOLODIPUEBLO@GMAIL.COM

CEL.585 9500

Parlamentario Xiomara Maduro: UN MINISTER CU 5 CARTERA, PERO NI UN SOLO RECIBO

Den su discurso durante e reunion publico cu Minister Gerlien Croes, Parlamentario Xiomara Maduro a trece dilanti cu Pueblo ta sumamente preocupa cu Minister Gerlien Croes, ya cu e mandatario te ainda no por muestra un simpel recibo di su “biahe di trabou” den avion priva.

5 cartera, mas responsabilidad

E parlamentario ta enfatisa cu e minister ta encarga cu 5 cartera y esaki ta trece hopi poder cun’e, y cu gran poder ta bin gran responsabilidad. “Pa e motibo ey, un minister cu 5 cartera, no por permiti su mes pa keda sin duna claridad y keda sin presenta e recibo di pago pa su biahe di trabou den

avion priva” Maduro ta expresa.

Patronchi peligroso

“Sinembargo nos ta mira un patronchi hopi peligroso di e minister, di cambia version, desvia atencion, culpa oposicion y presenta e cuestionamento legitimo como si fuera ta persecucion politico e ta,” e parlamentario ta splica.

No kier muestra recibo

Parlamentario Maduro ta cuestiona: “Si e biahe tabata pa trabou, ta con dificil e por ta pa e minister pa muestra e recibo y caba cu tur e discusion? Pakico Minister Gerlien ta insisti pa no contesta pregunta riba e biahe cu avion priva? Ta kico ta stroba e minister pa muestra e recibo?”

Pueblo kier transparencia

Segun Maduro, Pueblo kier claridad y no ta pidi pa drama. Pueblo merece miho, ta pidi transparencia y consistencia.

Pueblo merece lidernan cu ta comprende cu poder publico ta bin cu responsabilidad y no solamente privilegio.

Un minister cu ta maneja 5 cartera, tin poder y responsabilidad grandi, y cune no por permiti su mes e luho pa keda sin muestra pueblo e recibo pa su biahe di trabou den avion priva.


Cada dia cu Gerlien keda sin contesta, e ta bezig ta debilita democracia na Aruba, Parlamentario Maduro ta bisa na final.



CAMBIO DEN PRIJS DI PRODUCTIONAN PETROLERO 13 DI MEI 2026

ORANJESTAD - Minister di Finansa, Asunto Economico y Sector Primario ta anuncia e prijsnan nobo di benta di combustibel entrante 13 di mei 2026:

Gasoline unleaded-premium	: 265,2 cen p/ltr. (+ 17,2 cen)
Diesel ULS	: 257,0 cen p/ltr. (+ 10,5 cen)
Kerosin	: 301,6 cen p/ltr. (+ 7,6 cen)
E prijsnan ta inclui BBO/BAZV/BAVP	





Noticia di Corte

4 AÑA DI PRISON PA 381 KILO: “M’A HACI’E PA NECESIDAD”

ORANJESTAD – E homber A.B. (49) a presenta den Corte pa scucha su sentencia. Hues ta haya A.B. complice di importacion di 381 kilo di marihuana.

SOLO DI PUEBLO por a compronde cu Fiscal a existi 5 aña di prison y Hues a baha e castigo existi pa Fiscal.

Luna pasa durante tratamento di e caso a tuma lugar caminda Hues a remarca cu A.B. a yega di cay sera caba pa traficacion di droga. Segun A.B. dos biaha el a wordo condena pa traficacion di droga. Tur dos biaha tabata 22 luna di prison. Tambe e tin un condena di 12 luna di prison pa traficacion di hende. Hues a puntra A.B. si e gusta prison pasobra ya ta 3 biaha cu el a haya castigo di prison. A.B. a bisa cu door di necesidad el a haci esey. Den e caso aki, A.B. a bisa cu e lo a haya 20 paki di marihuana cu ta mas o menos 20 mil florin como pago.

EXIGENCIA DI FISCAL

Fiscal a bisa cu e ta haya legalmente proba cu A.B. ta involvi den traficacion di droga. Fiscal a bisa cu Servicio di Inteligencia di Polis a haya informacion cu A.B. lo tin importacion di droga. Tabatin auto ta warda e boto y ora Guarda Costa a bay riba e boto, e boto a drenta den mangelnan

y e hendenan a core bay. A logra detene un di e hendenan. A haya combersacion di A.B. den celular caminda e ta bisa cu e ta cla pa ricibi e cargamento. Den un otro celular ta mira potretnan di e pier na unda e boto lo mester a yega. Fiscal a bisa cu e usamento di droga ta causa adiccion y fomenta criminalidad. El a remarca cu A.B. ta un residivista. Fiscal ta haya cu A.B. no ta realisa e daño cu e ta haciendo na comunidad. Fiscal a existi 5 aña di prison y e 2 cellularnan lo mester keda confisca.

ABOGADO

Mr. de Koning a bisa Hues cu e ta haya cu A.B. a purba y mester considera esaki un intento di complice di importacion. Na opinion di abogado, A.B. su trabao tabata solamente ricibi y warda e droga. Esey no a keda realisa ya cu e droga a keda intercepta. E abogado ta haya cu no tabatin cooperacion estrecho y pesey e no ta haya cu por papia di complice. Segun e abogado, A.B. no tabata riba e boto y no tin nada di haci cu e organizacion di e viahe di e boto. Su trabou tabata mas bien facilita cu e droga ta wordo warda pa otro busca. E abogado a pidi Hues pa no considera A.B. complice di importacion di lote di marihuana.

SENTENCIA

Diabierna ultimo e sentencia a tuma lugar caminda Hues a bisa cu abogado a bisa cu A.B. no ta complice di e traficacion di e lote di droga. Hues ta haya cu A.B. a yuda importa 381 kilo di marihuana. Hues a bisa cu A.B. tabata na e rancho ta warda e boto yega. Hues a muestra cu for di investigacion ta muestra cu for di 9 Mei 2025, A.B. lo a manda coordinacion pa esnan cu ta trece e droga, unda e rancho ta. A.B. a bisa cu a palabra cu un Venezolano y un Colombiano pa e droga yega. E lo haya 20 liber di marihuana. For di su celular por a mira cu A.B. tabatin contacto cu esnan di e boto.

Hues ta haya cu A.B. a coordina e importacion y como tal A.B. ta complice di importacion.

CASTIGO DI 4 AÑA DI PRISON

Pa cu e castigo, Hues a bisa cu e ta tene cuenta cu A.B. a yuda den traficacion di droga cu ta afecta salubridad di comunidad y fomenta criminalidad.

Hues a tuma na malo cu A.B. a haci esaki pa gana placa. Ademá cu anterior dos biaha caba A.B. a wordo condena pa droga. Hues a bisa cu el a tene cuenta cu orientacion di sentencianan di Corte Superior y a condena A.B. na 4 aña di prison y e cellularnan ta keda confisca.

DEPARTAMENTO DI IMPUESTO LO TA CERA RIBA E DIANAN VENIDERO 12-05-2026, 14:47


En conexion cu Dia di Ascencion y un dia colectivo di ATV

ORANJESTAD – Departamento di Impuesto ta participa cu su oficina principal na Camacuri como tambe tur otro oficina den distrito lo ta cera riba diahuebs dia 14 di mei 2026 y diabierna dia 15 di mei 2026. Esaki en conexion cu Dia di Ascencion y un dia colectivo di ATV. Dialuna dia 18 di mei 2026, Departamento di

Impuesto lo brinda servicio segun e orarionan di custumber.

Departamento di Impuesto ta pidi tur contribuyente pa tuma bon nota di e cambio menciona pa evita cualkier inconveniencia.

Gerencia di Departamento di Impuesto
12 di mei 2026



GEOFFREY: GASOLIN TA SUBI PA 2.65 PA LITER, +17 CENT Y DIESEL 2.57

Minister Geoffrey Wever: bahada di accijns ta mitiga subida di prijs di gasolin y diesel den mei

Oranjestad, 11 di mei 2026 – Minister di Finansa, Asunto Economico y Sector Primario Geoffrey Wever ta informa cu entrante 13 di mei 2026 prijs di gasolin lo bira Afl. 2,65 pa liter y prijs di diesel lo bira Afl. 2,57 pa liter. E bahada di accijns pa mitiga e subida drastico di prijs di petroleo y productonan petrolero ta incorpora den ambos prijs. Sin e decision di Gabinete AVP-FUTURO pa accijns riba gasolin y diesel desde 8 di april 2026, e consumidor lo mester a paga Afl. 2,86 pa liter di gasolin y Afl. 2,90 pa liter di diesel.

Calculacionnan di Departamento di Asunto Economico, Comercio y Industria ta muestra cu entrante 13 di mei prijs pa liter di gasolin lo conoce un cambio di Afl. 2,48 pa Afl. 2,65 cu ta igual na un subida di 17.2 cent pa liter (+6.9%). Prijs pa liter di diesel lo conoce un cambio di Afl. 2,47 pa Afl. 2,57 cu ta igual na un subida di 10.5 cent pa liter (+2.6%). Prijs di liter di kerosin lo subi di Afl. 2,94 pa Afl. 3,02, un subida di 7.6 cen (+2.6%).

E postings, e prijs averahe pa luna



di april como componente den e structura di prijs, ta muestra un subida compara cu maart. E subida den prijsnan internacional pa productonan petrolero ta traduci automaticamente den un subida di prijs na Aruba.

Manera anuncia den luna di april, Gabinete AVP-FUTURO ta absorba mitar di e subida aki. Esaki ta encera cu a baha temporalmente accijns riba gasolin cu 21,2 cen pa liter. Accijns riba diesel a wordo kita completamente, di 33,2 cen pa o cen pa liter. E bahada

di accijns ta costa pa dos luna 5,1 milyon florin. Pa cubri esaki, Gabinete AVP-FUTURO den un esfuerzo colectivo a crea e espacio financiero y a crea e buffer necesario pa asina absorba e subida drastico di prijs internacional di productonan petrolero.

Aborba e impacto di guerra ta den liña cu Programa di Gobernacion 2025- 2028. Meta di maneho economico manera indica riba pagina 36, ta baha prijs di gasolin y diesel door di reduci accijns.


Gabinete AVP-FUTURO ta sigui monitor e efecto di prijsnan internacional di productonan petrolero riba prijs di gasolin y diesel pa consumidor y lo comunica na tempo cualkier decision pa mitiga esaki dentro di e cuadro financiero y cumpli cu e norma di presupuesto manera ley ta bisa.

Decision pa habri e Estrecho di Hormuz ta un factor determinante riba e desaroyo y volatilidad diario den e prijs di petroleo.

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



Na caminda pa Mundial



ROCKEFELLER CENTER LO BIRA E CAS DI FUTBOL CU EXPO 'E LEGADO DI E CAMPEONNAN'

Den curason di Manhattan, e emblematico Rockefeller Center lo transforma den un tempel pa e fanaticada di futbol. For di 11 di juni te cu 19 di juli, durante e celebracion di Copa Mundial 2026, lo presenta e exposicion "E Legado di e Campeonnan" (The Legacy of the Champions), un experiencia inmersivo cu lo conta e historia y cultura di e deporte mas grandi di mundo.

Un biahe for di 1930 te awe

E muestra aki, presenta pa e Museo di FIFA y Hyundai Motor, ta rindi homenahe na tur e edicionnan di Mundial cu a wordo hunga desde e prome na Uruguay (1930). E bishitantenan lo por admira:

Piesanan original: Obhetonan cu a pertenece na e campeonnan historico.

E Trofeonan: Tanto e trofeo actual como e legendario Jules Rimet (uza entre 1930 y 1970).

Uniformnan di 2026: E jerseyman di tur e 48 seleccionnan cu lo competi den e edicion aki na Merca, Mexico y Canada.

Experiencianan inolvidabel



E exposicion no ta solamente pa mira, sino pa sinti e emocion di futbol:

'La Final': Un instalacion cinematografico cu ta recrea e intensidad y e nervio di e partido di mas importante di e torneo.

'E muraya di e Campeonnan': Un tributo special pa cada hungador cu a yega di halsa e copa mundial.

Trivia y premionan: For di 6 pa 19 di juli, den e parti exterior di e edificio, lo tin weganen interactivo caminda fanaticonan por gana premio.


Un regalo pa e fanaticada

Marco Fazzone, director general di e Museo di FIFA, a expresa su entusiasmo: "Nos ta masha ilusiona pa ricibi fanaticonan di henter mundo y ofrece nan un

espacio caminda nan por conecta y comparti e magia di e deporte aki."

Pa esnan cu tin plan di bishita New York durante e Mundial, un dato importante: e entrada ta completamente gratis. Sinembargo, ta recomenda pa reserva e ticketnan con antelacion via e website oficial di Rockefeller Center pa sigura un luga.

Na caminda pa Mundial



NA CAMINDA PA MUNDIAL 2026: CARVAJAL, PAFO DI E PRE-LISTA DI SPAÑA, TA KEDA SIN MUNDIAL



E soño di Dani Carvajal pa fungi como un di e pilarnan di Spaña den e proximo Copa Mundial 2026 a wordo interrompi. E hungador di Real Madrid, cu a bisti e uniform di "La Roja" na 52 ocasion, no a wordo inclui den e pre-lista di 55 hungado cu e bondscoach Luis de la Fuente a entrega dialuna. Esaki ta nifica oficialmente cu Carvajal lo no biaha p'e torneo, ya cu e lista final di 26 hungado mester sali obligatoriamente for di e seleccion inicial aki.

Lesion: E pio enemigo di Carvajal Segun fuentenan di EFE, e lateral derecho tabatin e Mundial aki como su meta principal p'e temporada. Sinembargo, su caminda pa recuperacion tabata yen di obstaculo:

October 2024: Un lesion grave di ligamento crusa (ACL) a cambia su carera completamente, lagand'e 238 dia paf di e seleccion.

Temporada actual: Carvajal no a logra haya continuidad. E mester

a bolbe drenta sala di operacion dia 28 di october ultimo pa un artroscopia na su rudia opera.

Ultimo lunanan: Un lesion muscular y, mas recientemente, un fisura na su pia a pone cu e no por a gara e ritmo necesario. E aña aki el a hunga solamente 885 minuut den 20 partido.

Cu esaki, Carvajal ta keda sin e unico trofeo cu falta den su vitrina personal, despues di a gana e Nations League (2023) y e

Eurocopa (2024).

Presencia di Real Madrid y e seleccion

A pesar di e ausencia di Carvajal, Real Madrid si tin tres representante den e pre-lista di De la Fuente:

Dean Huijsen (defensa central)
– Esun cu mas chens di drenta e lista final.

Fran García (lateral robes).

Gonzalo García (delantero).

Reglanan estricto di FIFA

E seleccion di 55 hungador cu a wordo entrega na FIFA ta vinculante. Segun e normativa nobo, si un hungador lesiona prome cu e torneo, e coach mester scoge un reemplasante obligatoriamente for di e lista aki, te cu un maximo di 24 ora prome cu e prome partido.

Fechanan clave pa Spaña:

25 di mei: Luis de la Fuente lo anuncia e lista final di 26 hungador.

30 di mei: E seleccion lo cuminsa entrena na Las Rozas.

15 di juni: Spaña ta debuta den Mundial contra Cabo Verde.--

Parlamentario Shailiny Tromp-Lee:

CAMINDANAN DEN MAL ESTADO MIENTRAS 18 MIYON FLORIN A KEDA SIN UZA: UN FALTA GRAVE DI TRANSPARENCIA Y MANEHO

Despues di mas di 400 dia di silencio, e falta di accion di e actual Gobierno riba e maneho di nos infraestructura ta keda demonstra un biaha mas. Ta keda confirma cu un suma di 18 miyon florin, cu tabata specialmente destina pa asfalta caminda, a keda sin wordo uza. Esaki no solamente ta un oportunidad perdi pa drecha nos careteranan, sino un falta di respet pa e fondonan publico y pa e seguridad di e ciudadano cu tur dia mester transita den camindanan den mal estado.

Como parlamemtario, mi ta cuestiona seriamente e echo cu e placa aki tabata disponibel, camindanan stipula a base di criterio di DOW y cla pa start cu ehecucion, y toch e Gobierno actual a opta pa no haci nada. Un aña completo sin accion pa loke ta trata asfaltamento di camindanan. E fondonan aki a keda aloca na December 2024 cu e meta pa mira resultadonan concreto den


2025. Sinembargo, nos ta den Mei 2026 y e realidad ta cu e minister concerni no por duna un splicacion debido pa hustifica dicon no a uza e 18 miyon florin aki.

Tempo y placa perdi

Goberna ta nifica pone prioridad, y den e caso aki, e prioridad no tabata cerca e bienestar di e pueblo ni e mantencion di nos camindanan. Ora cu un Gobierno haya fondonan extra y un plan structural den ehecucion, e unico cos cu falta ta boluntad y transparencia.

Silencio no ta un contesta

E minister no por keda sin responsabilisa su mes: pakico no a uza e 18 miyon pa drecha nos careteranan? Un oportunidad perdi! Un situacion Injustificabel pasobra ta dificil pa compronde dicon despues di 403 dia di "silencio", ningun di e camindanan identifica pa wordo drecha of pa porfin haya asfalt, no a mira



ni un gota di asfalt.

Exigencia pa transparencia

Como parlamentario, nos tin cu para keto riba e echo cu placa di pueblo mester wordo uza pa loke el a wordo acorda. Ora cu 18 miyon florin "bay perdi" den e burocracia of falta di decision di un minister, e ta afecta e credibilidad di henter nos gobernacion.

Nos no por permiti cu inversionnan vital pa nos pais keda para simplemente, pasobra e minister no kier of no por ehecuta. Pueblo di Aruba merece sa dicon e placa aki no a wordo uza y ken ta bay carga e responsabilidad pa e retraso aki cu ta afecta nos tur.

DEPARTAMENTO DI IMPUESTO LO TA CERA RIBA E DIANAN VENIDERO 12-05-2026, 14:47


En conexion cu Dia di Ascencion y un dia colectivo di ATV

ORANJESTAD – Departamento di Impuesto ta participa cu su oficina principal na Camacuri como tambe tur otro oficina den distrito lo ta cera riba diahuebs dia 14 di mei 2026 y diabierna dia 15 di mei 2026. Esaki en conexion cu Dia di Ascencion y un dia colectivo di ATV. Dialuna dia 18 di mei 2026, Departamento di

Impuesto lo brinda servicio segun e orarionan di custumber.

Departamento di Impuesto ta pidi tur contribuyente pa tuma bon nota di e cambio menciona pa evita cualkier inconveniencia.

Gerencia di Departamento di Impuesto
12 di mei 2026



Parlamentario Endy Croes: Presupuesto di DOW a keda aproba MEYMEY DI UN BADABADA DURANTE UN REUNION PUBLICO AVP A BATI POBER BABA CU 6 MOCION

Diamars ultimo, Parlamento a trata e presupuesto di DOW pa aña 2026 den un session extensivo. E reunion publico a inicia pa 9'or di mainta y a termina rond di 10'or di anochi. Minister Baba Herde a pasa 13 ora den Parlamento defendiendo dicho presupuesto, cual finalmente a keda aproba despues di hopi dolor di cabes. Na final di e reunion publico, Minister Herd  a bandona sala di Parlamento bastante soda y e tabata musta hopi cansa.

AVP a suta su propio minister cu 6 mocion

Durante e reunion, a tuma nota cu tur Fraccion a presenta mocion. Un total di 10 mocion a wordo presenta, di cual dos (2) tabata di MEP y dos (2) di PPA. Loke tabata incomprendibel ta cu e propio Coalicion AVP-Futuro a suta nan propio minister cu 6 mocion. Esaki ta e prome se al pa Minister Baba Herd  cu e parlamentarionan di AVP kier mira hopi cambio den e presupuesto y cu nan no ta di acuerdo cu e manera cu esaki a wordo presenta na Parlamento. Por ehempel, tin solamente 3.5 miyon pa asfalta caretera durante

 a 2026, mientras cu MEP a laga 18 miyon aproba bou di un "Masterplan di DOW", cual tabata identifica tur e careteranan cu mester a wordo asfalta of drecha durante  a 2025. Croes a splica cu gobernacion ta un continuacion y no pasobra gobierno a cambia, mester a para e proyectonan aki. Lamentablemente, e escogencia di AVP-Futuro durante  a 2025 tabata diferente, ya cu nan a opta pa traspasa e 18 miyon den e fondo di inversion pa realiza otro tipo di proyecto. Consecuentemente, mas di 400 dia a traspasa y Gobierno no a asfalta ni un "hanchi" ainda. Den sala di Parlamento a bira evidente cu e situacion aki a genera preocupaci n cerca varios miembro di e mesun coalicion.

AVP a presenta un mocion di desconfianza

AVP a presenta un mocion cual MEP ta considera como un mocion di desconfianza contra nan propio minister. "Mas claro no canta un gallo": e mocion aki a laga Minister Baba "babuca". Den e mocion number dos (2) aki, e propio fraccion di AVP a splica cu e presupuesto di DOW no ta



contene un bista cla y completo di e proyectonan concreto pa  a 2026. No tin un conexi n directo y visible entre e gastonan asigna y e proyectonan specifico, locual ta stroba Parlamento di ehecuta su tarea di control riba gastonan publico debi na e falta di informaci n (indirectamente AVP ta bisa aki cu Baba ta sconde cos). Kisas Minister Baba tabata kier men cu el a bin pa "bolter cos", pero e mocion di AVP ta termina urgiendo Gobierno pa, den un periodo di 30 dia, presenta un bista specifico di tur proyecto

planian pa DOW den 2026. Alabes, AVP ta exige pa e minister indica claramente e presupuesto asigna, e meta y e fecha di inicio di cada proyecto cu gobierno tin pensa di realiza durante  a 2026. Esaki tabata un mocion "candela" pa Minister Herd  biniendo for di su mesun partido, locual sigur por wordo interpreta como un mocion di desconfianza. E mocion aki a wordo aproba pa tur Fraccion. Maske e ley a wordo aproba na final di anochi, Minister Baba Herde a bandona sala di Parlamento poco tolondra y basta zuur.

TUMA ACCION PA PREVENI, PROTEHA Y STOP DENGUE CON NOS POR STOP DENGUE?



Minister Geoffrey Wever:

BAHADA DI ACCIJNS TA MITIGA SUBIDA DI PRIJS DI GASOLIN Y DIESEL DEN MEI

Oranjestad, 11 di mei 2026 – Minister di Finansa, Asunto Economico y Sector Primario Geoffrey Wever ta informa cu entrante 13 di mei 2026 prijs di gasolin lo bira Afl. 2,65 pa liter y prijs di diesel lo bira Afl. 2,57 pa liter. E bahada di accijns pa mitiga e subida drastico di prijs di petroleo y productonan petrolero ta incorpora den ambos prijs. Sin e decision di Gabinete AVP-FUTURO pa accijns riba gasolin y diesel desde 8 di april 2026, e consumidor lo mester a paga Afl. 2,89 pa liter di gasolin y Afl. 2,95 pa liter di diesel.

Calculacionnan di Departamento di Asunto Economico, Comercio y Industria ta muestra cu entrante 13 di mei prijs pa liter di gasolin lo conoce un cambio di Afl. 2,48 pa Afl.

2,65 cu ta igual na un subida di 17.2 cent pa liter (+6.9%). Prijs pa liter di diesel lo conoce un cambio di Afl. 2,47 pa Afl. 2,57 cu ta igual na un subida di 10.5 cent pa liter (+2.6%). Prijs di liter di kerosin lo subi di Afl. 2,94 pa Afl. 3,02, un subida di 7.6 cen (+2.6%).

E postings, e prijs avarahe pa luna di april como componente den e estructura di prijs, ta muestra un subida compara cu maart. E subida den prijsnan internacional pa productonan petrolero ta traduci automaticamente den un subida di prijs na Aruba.

Manera anuncia den luna di april, Gabinete AVP-FUTURO ta absorba mitar di e subida aki. Esaki ta encera cu a baha temporalmente accijns riba gasolin cu 21,2 cen pa

liter. Accijns riba diesel a wordo kita completamente, di 33,2 cen pa o cen pa liter. E bahada di accijns ta costa pa dos luna 5,1 miyon florin. Pa cubri esaki, Gabinete AVP-FUTURO den un esfuerzo colectivo a crea e espacio financiero y a crea e buffer necesario pa asina absorba e subida drastico di prijs internacional di productonan petrolero.

Aborba e impacto di guerra ta den liña cu Programa di Gobernacion 2025-2028. Meta di maneho economico manera indica riba pagina 36, ta baha prijs di gasolin y diesel door di reduci accijns.

Gabinete AVP-FUTURO ta sigui monitor e efecto di prijsnan internacional di productonan petrolero riba prijs di gasolin y



diesel pa consumidor y lo comunica na tempo cualkier decision pa mitiga esaki dentro di e cuadro financiero y cumpli cu e norma di presupuesto manera ley ta bisa. Decision pa habri e Estrecho di Hormuz ta un factor determinante riba e desaroyo y volatilidad diario den e prijs di petroleo.

Parlamentario Jennifer Arends-Reyes:

ENSEÑANSA NO POR WARDAR: URGENCIA, CONTINUIDAD Y TRANSPARENCIA MESTER BAY HUNTO

ORANJESTAD (11 di mei 2026) – Lider di fraccion di AVP, Sra. Jennifer Arends-Reyes, a expresa cu e reciente reunion publico tocante instruccion pa cierto accion den sector di educacion supuestamente sin un proceso formal di destaho publico, a crea preguntanan cu merece contestanan pa clarifica e ponencia aki.

Segun Arends-Reyes, desde januari 2026 a ahusta e Ley di Contabilidad estableciendo cu pa sumanan entre 25 mil y 200 mil florin, un proceso formal di destaho publico no ta obligatorio. Den e caso aki, Minister Croes a splica cu mirando e montantenan involvi, realmente no tabata necesario pa sigui un destaho

publico, aunke ministerio a opta pa haci esey di tur manera.

“Transparencia y bon gobernacion ta fundamental den un pais democratico. Pueblo di Aruba tin derecho di sa con decisionnan ta wordo tuma, specialmente ora ta asuntonan den comunidad,” Arends-Reyes a declara. Sin embargo, e parlamentario a enfatisa cu tambe mester tin un balans entre transparencia y e necesidad pa actua cu rapidez ora continuidad di enseñansa ta na peligro.

“Educacion ta un sector primordial, e ta e base di futuro di Aruba. Ora scolnan ta enfrenta falta di material esencial, sosten digital of otro servicio necesario

y continuidad gobierno no por simplemente laga proceso administrativo causa retraso den enseñansa,” el a agrega.

Arends-Reyes a splica cu e ley mes ta contempla excepcionnan precisamente pa situacionnan extraordinario unda urgencia ta exige accion inmediato. Segun e parlamentario, si Ministerio di Enseñansa a determina cu un proceso regular di destaho publico lo tuma demasiado tempo y lo pone continuidad educativo na riesgo, e uzo di un excepcion por considera un decision responsabel.

Tambe el a señala cu den e caso specifico di material educativo pa Papiamento y Hulandes como idioma stranhero pa scolnan basico, e excepcion en realidad



no tabata necesario, hustamente pasobra e suma ta bou di e limite cu ley ta exige pa un destaho publico.

“Mi ta completamente pro transparencia, pero mi ta tambe pro progreso. Aruba mester un sistema educativo moderno, fuerte y efectivo. Y pa logra esey, gobierno mester por actua rapido ora situacion ta exige esey, pero semper cu claridad y responsabilidad” Arends-Reyes a conclui.

EVELYN NA GERLIEN: DUNA CUENTA “KI DIA, CUANTO Y NA KEN” BA PAGA P’E JET PRIVA

Dialuna 11 di Mei, durante un reunion den parlamento di Aruba, lider di fraccion di MEP y ex prome minister di Aruba a haci preguntanan basta skerpi na Minister Gerlien Croes. Despues di a duna un splicacion basta amplio, cu Minister Gerlien Croes a viola tur sorto di ley di conducta di minister, Evelyn a pidi Gerlien pa duna cuenta “Ki dia, cuanto y na ken” el’a paga pe viahe den jet. Tur cos ta muestra cu Gerlien a paga, segun su propio declaracion. Di otro banda esnan cu ta atende e avion a rechasa di

a ricibi placa. Pues, un of otro hende a cobra? Ki dia cuanto y na ken Gerlien a paga? Durante 5 ora di reunion, Gerlien Croes a nenga di toca e tema aki. El’a splica cu e no tin ningun abogado/hursita cune e momento ey den sala pa por contesta riba e jet priva. Tambe Parlamentario Evelyn Wever Croes a contra aresta e splicacion duna pa Gerlien na Noticia Cla, esta cu e viahe ta priva y cu ta mescos si e viaha pa New York y come den restaurant, e no mester




saca recibo pa muestra. Den e caso aki, Evelyn a bisa: E viahe aki no ta uno priva. Bo no por compare cu priva. E minister a bay pa trabao, y ta como minister el’a subi e jet priva, cual ta haci cu e mester saca e recibo pa proba.

DENUNCIA HACI PA ACTONAN CORUPTIVO DEN OFICINA DI MIKE EMAN RELACIONA CU BISHITA DI REY

Ex Promer Minister Sra. Evelyn Wever Croes a informa cu el’a manda un carta pa Ministerio Publico, di loke a yega serca dje na informacion. Ta trata di un asunto corruptivo cu a tuma lugar den oficna di Mike Eman, unda segun nos por compronde tin di haber cu e comicion cu a organisa eventonan rond di e bishita di Rey Willem Alexander. Mas informacion no a wordo suministra, pero hecho ta cu esnan den oficina di Mike Eman lo mester a haci actonan sospechoso/corruptivo.



LANSAMENTO DI TERENO, UN PASO DECISIVO DEN DIGITALISACION DI SERVICIO PUBLICO



Gobierno di Aruba, den colaboracion cu Dienst Landmeetkunde en Vastgoedregistratie (DLV) ta contento cu e implementacion di TERENO a drenta su fase final, marcando un paso decisivo den modernisacion di servicio publico na Aruba.

For di diabierna dia 8 di mei, a cuminsa cu e trabounan di migracion di e sistema bieu pa e plataforma digital nobo.

Diadomingo mainta, un team dedica a cuminsa cu e control y validez di e traspaso di data, pa sigura cu e transicion wordo ehecuta di forma sigur y eficiente.

Minister di Infraestructura, drs. Rene Herdê tambe tawata presente diadomingo pa asina duna sosten y gradici e team pa nan dedicacion y esfuerzo. Segun e planificacion actual, pronostico ta cu pa dia 11 di mei na final di dia, e aplicacion di TERENO lo ta

operacional internamente pa DLV. Esaki ta un paso importante prome cu su implementacion mas amplio pa stakeholdernan externo.

TERENO ta un portal digital cu lo permiti usuario nan pa solicita informacion cadastral completamente online, eliminando proceso manual y reduciendo necesidad di presencia fisico. E plataforma ta funciona como un punto central, sigur y transparente pa interaccion cu DLV.

Entre e beneficienan principal di e sistema nobo ta destaca e aumento significativo den eficiencia di proceso, servicio mas rapido y accesibel, transparencia total den siguimento di solicitud, reduccion di carga administrativo y miho

calidad di data.

Ademas, TERENO ta fortalece colaboracion entre stakeholdernan door di facilita intercambio sigur di informacion, contribuyendo na un sistema di administracion di tereno mas integra y moderno.

Gobierno di Aruba ta enfatisa cu esaki ta

un ehempel concreto di su compromiso cu digitalisacion, innovacion y mehoracion continuo di servicio publico. E implementacion di TERENO no solamente ta un cambio tecnologico, pero un paso structural pa servicio mas eficiente y orienta na e ciudadanonan di nos isla.

Clasificados



SOLODIPUEBLO@GMAIL.COM

CEL. 585 9500

A.T.A. A ENTREGA SU RAPPORT ANUAL 2025

Aruba Tourism Authority (A.T.A.) a entrega dialuna, 11 di mei, su rapport anual pa 2025 na Minister di Turismo, Transporte y Labor, mr. Wendrick Cicilia, asina cumpliendo cu e reglanan vigente y cu e obligacionnan stipula den e Landsverordening instelling A.T.A. Sui Generis. Esaki ta marca otro paso importante den e trayectoria di A.T.A. como un entidad autonomo cu ta traha di manera consistente, responsabel y orienta riba futuro.

Desde cu A.T.A. a wordo estableci como entidad autonomo na 2011, e organisacion a cumpli cada aña cu entrega oportuno di su rapport annual, cu a pasa su proceso di audit financiero entre otro, permitiendo pa tin un bista cla y transparente di maneho financiero y di e direccion strategico cu A.T.A. ta sigui y locual a ehecuta den e cuadro aki na 2025.

Vision: Un Aruba Dushi pa Biba ta un Aruba Dushi pa Bishita

Un paso clave den 2025 tabata incorporacion di A.T.A. su di 4 plan di maneho MACS ("Multi-Annual Corporate Strategy") cu ta consisti di 4 etapa di turismo responsabel te cu turismo regenerativo. Etapa 1 a inicia na 2025. A entrega un resumen di e strategia y prioridadnan den forma di un Position Paper di A.T.A. na luna di februari na formadornan y djei na diferente actor clave. E documento aki ta articula e vision a largo plaso y ta propone un modelo di gobernacion riba nivel gubernamental, encurashando un manera di trabou unda di manera inter-ministerial ta duna enfoke debido na e agenda di turismo.

E Rapport Anual ta incorpora tambe e Sustainability Ambition di A.T.A., cu tin como meta inspira, compromete y guia e organisacion den haci decisionnan cu ta pone



preservacion di medio ambiente, cultura y calidad di bida di Aruba na promer lugar. Ta duna ehempel di pasonan tuma na 2025.

Ademas, A.T.A. a sigui fortaleca e calidad di nos destino, enfocando riba siguridad, espacionan publico y recreativo di Aruba. A traves di mehoracion coordina di "trails", areanan rond di nos costa, servicionan publico y sitionan cultural, A.T.A. a contribui na un maneho sostenibel di e recursonan comparti di nos isla, apoyando un experiencia di bishita mas balansa y significativo, cu benefician tanto pa comunidad local como pa huespednan.

Acuerdonan strategico y colaboracion cu socionan local a keda clave

Durante 2025, A.T.A. a sigui implementa y apoya diferente iniciativa di turismo sostenibel, incluyendo colaboracion strategico cu partnernan manera Aruba Conservation Foundation (ACF), Aruba Hospitality & Security Foundation, Aruba Excellence Foundation, CEDE Aruba, Stimami Sterilisami, Go Cultura Foundation, Comité Olimpico Arubano (COA), Fundacion Chico Harms, Colegio EPI/SEPBB y otro actor publico y priva. Tambe a aumenta enfoke local pa medio di campananan di conscientisacion

manera BanSerio cu asina a yuda fomenta comportacionnan positivo y un sentido di responsabilidad comparti entre residentenan.

Investigacion, dunamento di consejo, pero tambe advocacia a sigui forma parti central di e trabou di A.T.A., cu ta reafirma su compromiso cu un maneho di destino responsabel y un balans social, ambiental y economico pa beneficio di generacionnan presente y futuro, y na beneficio di nos comunidad y huespednan.

Cambio completo di strategia di comunicacion internacional

E Rapport Anual 2025 ta refleha un cambio consciente y delibera den e manera cu A.T.A. ta aborda mercadeo, promocion y comunicacion internacional, cu e evolucion continuo di su strategia aña pasa a lansa "When you Love Aruba, It Loves You Back". E enfoke aki ta parti di e reconocimiento cu turismo responsabel no ta un opcion, sino un imperativo global, y ta marca un transicion di turismo transaccional pa un modelo basa riba balor, calidad y impacto positivo. Aruba ta papia di esaki cu e huesped potencial, prome cu e dicidi di scoge pa Aruba.

Resultado di Turismo 2025

A.T.A. a observa cu e desempeño di turismo di Aruba den aña 2025

tabata uno fuerte. Mientras cu ta enfoca riba estabilisa e volumen di bishitante y trata di limita esaki y incrementa balor! Mester bisa cu e isla a ricibi 1,515,102 huespednan di stay over aña pasa, cu ta representa un aumento di 7% compara cu 2024 y cu a pasa e proyeccion pa 2025. Entrada di turismo ta aproximadamente Afl. 5.6 biyon, un aumento di 8% compara cu aña anterior, cu un gasto promedio diario di huesped cu ta yega mas o menos Afl. 550 pa dia.

Ta gradici

Ta gradici e ekipo di A.T.A. na Aruba y den e diferente mercadonan internacional pa e esfuersonan inmenso desplega den 2025. Tambe ta gradici Junta di Supervision di A.T.A. pa e diligencia y dedicacion den 2025 y como parti di e proceso di aprobacion di A.T.A. su Rapport Anual pa 2025. Ademas, ta gradici firma independiente Ernst & Young pa e trabou y colaboracion pa asina yega na un otro rapport anual cu entre otro un "goedkeurende verklaring" di nan parti.

Pa mas informacion y pa mira e resultadonan di e Rapport Anual, por bishita <https://www.ata.aw>.

SOPI DI LETRANAN

Familia

D	H	E	R	M	A	N	A	D	X	N	Z	W	R	K
B	J	R	O	H	Y	O	O	P	M	M	C	M	L	C
D	N	S	A	M	A	Z	N	W	D	K	O	Z	Z	B
F	O	L	Q	A	P	U	A	Q	Z	F	Q	S	Q	N
R	A	P	V	M	J	D	M	U	J	W	O	M	W	E
G	A	M	C	A	G	A	R	X	R	M	Z	E	P	M
P	L	U	I	M	O	T	E	I	I	U	P	B	V	X
C	E	I	A	L	V	K	H	R	I	K	X	A	S	K
Z	U	L	T	A	I	J	P	N	P	Q	A	P	P	D
I	B	H	I	O	P	A	F	L	K	O	J	E	O	A
F	A	M	A	N	F	E	A	Z	V	I	W	Z	N	T
Q	L	S	W	W	S	R	I	R	Q	K	O	J	R	I
A	E	X	M	R	J	R	T	O	S	C	I	I	I	H
H	H	Z	A	G	T	T	D	L	W	P	V	A	T	V
D	K	Y	W	H	G	A	B	U	E	L	O	Z	N	Q

ABUELA
ABUELO
FAMILIA
HERMANA
HERMANO
MAMA
PAPA
PRIMOS
TIA
TIO

SUDOKU

	7		6					
	9		5		3		1	7
				1				
	8						4	3
		2				6		
4	5						7	
				3				
7	4		2		5		6	
					4		2	

	3	8	5	7			9	
	6			1		5		7
	1		3		9		8	
6	9	3		4		7		
2		4			5		6	1
				8			4	9
8			4			9		
3					8	6	7	
5	7		1					4

			8		1			
						4	3	
5								
				7		8		
						1		
	2			3				
6							7	5
		3	4					
			2			6		



Oracion di dia

Un feliz dia fructifero colma cu hopi gracia di Dios.

'Ningun hende no por bini cerca Mi, si mi Tata cu a manda Mi no hal'e cerca Mi'. (Huan 6, 44)

Cristo ta bisa cu ta via di Dios so un hende por yega cerca djE. Mescos tambe den e lectura ta pa medio di un angel di Dios Felipe a

topa cu e africano. Cristo mes ta splica cu E ta e pan cu ta duna biba. Esaki ta nifica cu nos tin di sigui busca Cristo pa medio di oracion, pa medio di lesa Bijbel, cumpli cu e 10 mandamentonan, haci

bon obra, haci sacrificio y scucha e Palabra di Dios. Busca pa por conoce e Palabra di Dios, laga Pastoornan y Diacononan splica e Palabra di Dios ja asina nos por yega cerca di Dios y Cristo Hesus. Felipe a splica e homber di Etiopia e loke e tabata lesa di profeta Isaias y ora el a compronde el a wordo batisa mesora. Rumannan nos tin

di sigui y busca e pan cu ta duna bida cu ta Cristo. Haciendo esaki nos tin sigur di haya bida eterno.

Oracion: Dios Tata laga Spirito Santo inspira nos pa nos por sigui busca e pan cu ta duna nos bida cu ta Cristo.

Amen.

CONFERENCIA NA UNIVERSIDAD DI ARUBA: SHAPING RIGHTS ACROSS OCEANS: 75TH ANNIVERSARY OF THE EUROPEAN COURT OF HUMAN RIGHTS

Dia 4 di november 2025, e Convencion Europeo di Derechonan Humano (ECHR) a celebra su di 75 aña desde cu el a wordo traha y firma pa prome biaha pa e miembronan di Consejo di Europa. E ECHR tambe ta aplicabel pa e teritorionan Caribeense den exterior di algun Estado Europeo, esta Francia, Hulanda y Reino Uni. E aplicabilidad di e ECHR den e teritorionan Caribeense no a hala atencion significante den e hurisprudencia di Corte y den erudicion, lantando preguntanan importante: E derechonan bou di e ECHR ta efectivamente acesibel, invoca y enforsa den e teritorionan Caribeense? Escohonan politico, areglonan constitucional local of structuranan di gobernacion ta influencia ki ora y con e ECHR ta wordo uza? E ECHR ta integra den culturanan huridico local, educacion huridico, strategianan di defensa y discurso publico? Universidad di Aruba ta organisa un conferencia multidisciplinario di un dia riba 29 di mei 2026 cu ta explora e influencia di e Convencion Europeo di Derechonan Humano den Caribe. E lenguahe principal di e conferencia aki lo ta Ingles.

E meta principal ta pa trese hunto diverso profesional y profesionalnan huridico pa analisa con e derechonan garantis den ECHR ta wordo interpreta, contesta

y realisa den e salanan di corte y comunidnan di teritorionan Caribeense.

Nos ta invita tur persona den nos comunidad cu ta interesa den adkiri mas conocimiento ariba e tema aki pa participa na e conferencia informativo y educativo dia 29 di Mei. Pa mas informacion por tuma contacto cu nos na cll@ua.aw

Orador Principal
Jolien Schukking a fungi como hues na e Corte Europeo di Derechonan Humano (ECtHR) (2017–2026) y a sinta riba e banki hulandes for di 2009 te cu 2026. Su carera distingui ta

inclui sirbi como e Agente pa Hulanda dilanti di e ECtHR y e instancianan di Nacionnan Uni, y como Consehero Huridico Senior pa e Ministerio di Relacionnan Exterior.

Un docente prominente riba ley di derechonan humano, ela presidi numeroso gruponan huridico internacional, incluyendo e Fundacion Huesnan pa Huesnan.

Tambe e la sirbi cu Corte Permanente di Arbitrahe y tin un titulo di ley specialisa den ley di empresa Hulandes y Arubano.

Friday
May 29



Conference
Shaping Rights Across Oceans: The European Court of Human Rights (ECHR)
8:30 AM - 8:00 PM - Awg. 125 - Aula, University of Aruba

Keynote speaker
Jolien Schukking
Former Judge at the European Court of Human Rights

 Faculty of Law  University of Aruba



Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Merdia - May 12, 2026

 Sorteo # 4972 9072 2341 4146  X2  Sorteo # 4972 1525  X3  Sorteo # 3028 0713  Sorteo # 4972 5593 Tauro  Sorteo # 1846 232  X2	<table><tr><td> Sorteo # 0 x Jackpot 0 x Match 4+ 0 x Match 4 0 x Afl. 12,00</td><td>Joker Letter Proximo Jackpot 280.000,-</td></tr><tr><td> Sorteo # 0 x Jackpot 0 x Match 4 0 x Afl. 8,00</td><td>Proximo Jackpot 54.000,-</td></tr><tr><td> Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00</td><td>Mega Ball Proximo Jackpot 525.000,-</td></tr><tr><td> Afl. 1.625.000,-</td><td></td></tr></table>	 Sorteo # 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 280.000,-	 Sorteo # 0 x Jackpot 0 x Match 4 0 x Afl. 8,00	Proximo Jackpot 54.000,-	 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00	Mega Ball Proximo Jackpot 525.000,-	 Afl. 1.625.000,-	
 Sorteo # 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 280.000,-								
 Sorteo # 0 x Jackpot 0 x Match 4 0 x Afl. 8,00	Proximo Jackpot 54.000,-								
 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00	Mega Ball Proximo Jackpot 525.000,-								
 Afl. 1.625.000,-									


Sorteo #





Paardenbaaistraat 10, Oranjestad, Aruba Tel.: (297) 525 - 7555
www.lottoaruba.com
Resultado: Sorteo di Anochi - May 12, 2026

 Sorteo # 8844 6810 3744 2090  X2  Sorteo # 7888 2520  FP  Sorteo # 2593 7246  Sorteo # 6647 2183 Acuario  Sorteo # 1577 348  X2	<table><tr><td> Sorteo # 0 x Jackpot 0 x Match 4+ 0 x Match 4 0 x Afl. 12,00</td><td>Joker Letter Proximo Jackpot 280.000,-</td></tr><tr><td> Sorteo # 7177 0 x Jackpot 0 x Match 4 147 x Afl. 8,00</td><td>Proximo Jackpot 54.000,-</td></tr><tr><td> Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00</td><td>Mega Ball Proximo Jackpot 525.000,-</td></tr><tr><td> Afl. 1.625.000,-</td><td></td></tr></table>	 Sorteo # 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 280.000,-	 Sorteo # 7177 0 x Jackpot 0 x Match 4 147 x Afl. 8,00	Proximo Jackpot 54.000,-	 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00	Mega Ball Proximo Jackpot 525.000,-	 Afl. 1.625.000,-	
 Sorteo # 0 x Jackpot 0 x Match 4+ 0 x Match 4 0 x Afl. 12,00	Joker Letter Proximo Jackpot 280.000,-								
 Sorteo # 7177 0 x Jackpot 0 x Match 4 147 x Afl. 8,00	Proximo Jackpot 54.000,-								
 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00	Mega Ball Proximo Jackpot 525.000,-								
 Afl. 1.625.000,-									


Sorteo #



FORTALEZA PA FAMIA

Scirbi pa Pastor Marcel Balootje

COMUNICACION DEN FAMIA TA ROSEA PA BIDA

Mundo ta practicamente digitalisa, despues di Corona Virus, hende a keda separa for di otro, door di varios anja hende no por aserca otro pa evita di pega cu e virus cu a causa hopi morto riba mundo. Cu te dia di awe, no tin un cifra exacto cuanto hende a muri.

Awor nos comunicacion a bira mas digital, nos ta Whatsup, Voicemail, pero esaki no ta e comunicacion berdadero, comunicacion berdadero ta ora nos papia cu otro cara cu cara, mira otro, brasa otro, duna otro un man, sinti cu di berdad nos a topa y especialmente wak e estado fisico di e persona cu bo kier a mira, anto asina ey bo por bisa mi a mire y e ta mostra bon. Pasobra di pafo bo ta mira pero di paden ningun hende sa, ta Dios so sa.

Comunicacion den Famia ta algo di balora, pasobra ta keda masha mahos, ora hende ta biba hunto y nan no ta comunica, of nan ta asina dividi, cu ningun por contesta pa otro, den un sentido cu hasta nan no por bisa si un ta na cas of no.

Tin hende ta kere cu ora nan ta dividi, ta sabi nan ta of ta asina ta moda di biba awendia, den cual un ruman cu ta biba den cas cu otro, ta bisa bo cu e no sa di su ruman, e no ta deal cu su ruman, of ami ta bon, no puntrami pa mi ruman, e contestanan ey a bira masha na moda, pero e ta demonstra un bida bruha, caminda tin discucion y falta di pordon.

Mas fuerte ta ora relacion entre mayor y yiu ta debilita of casi no ta

existi, caminda mayor no ta atende cu mayor of mayor no ta atende cu yiu, pasobra ningun hende no kier wordo coregi, y ningun hende no kier pidi dispensa.

Pero e palabra di Dios ta recorda nos den Filipensenan 4:8-9 bisando: Finalmente, rumannan, tur loke ta berdadero, tur loke ta honorabel, tur loke ta husto, ur loke ta puro, tur loke ta bunita, tur loke ta di bon fama, sin tin algun birtud, y si tin algo digno di alabansa, laga esaki ocupa boso mente. E cosnan cu boso a sinja, y a ricibi y a tende y a mira den mi, practica e cosnan aki, y e Dios di pas lo ta cu boso.

Practicando locual e palabra di Dios ta bisa, nos lo crea relacion fuerte den famia, nos matrimonio lo ta fuerte, nos yuinan lo ta fuerte, y lo exist e berdadero union manera Dios kier pa nos ta uni, pa asina Dios por derama su bendicion riba henter e hogar.

Laga boso palabra ta semper cu gracia, sasona cu salu, pa boso por sa con boso mester contesta cada persona. (Colosensenan 4:6).

No laga ningun palabra danjino sali for di boso boca, sino palabra cu ta bon pa edificacion, conforme e necesidad di e momento, pa esaki duna gracia na esnan cu ta tende. (Efesenan 4:29).

Tur e articulo moderno cu tin pa comunica, no mester separa hende personalmente for di otro, nos mester sigi bishita otro, especialmente nos grandinan y esnan cu no por move facilmente.

Nos mester preserva pas y biba na pas cu otro, nos mester perdona otro, mescos cu Dios a perdona nos, laga nos bisti amor cual ta e laso perfecto di unidad.

Laga e pas di Cristo goberna boso curason, asina nos ripara cu cierto palabra of actitud ta hiba nos den caminda di desunion, nos mester usa sano huicio y corta mesora cu esey.

Comunicacion den famia, ta nifica amor, comprension, pordon, y




mascu tur cos, pas.

Sinceramente, Pastor Marcel Balootje.

"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa frankil,
Pa mi bolbe haña forza".
Salmo: 23

Nos ta anuncia fayecimento di:



Dennis Ovid Martino Laclé
*10-02-1955 - †12-05-2026

Acto di entierro lo wordo anuncia despues.